



CH-7144 Vella, 01/04/2016

Novitads dalla suprastonza communal

Reglaments da taxa ed uorden da santeri tier la lescha da sepultura ed uorden da santeri

La radunonza communal Lumnezia dils 11 da december 2015 ha approbau la nova lescha da sepultura e santeri. La lescha ei vegnida acceptada a caschun dalla votaziun all'urna dils 28 da fevrer 2016 ed ida en vigur cun quei datum. Leutier ein in reglament da taxas e reglaments da santeri vegni elavurai. La suprastonza communal ha mess en vigur quels reglaments per ils 28/02/2016.

Survir aperitiv suenter las radunonza communalas

Ils 26 menaschis d'ustria enteifer la vischnaunca Lumnezia han giu la pussevladad d'inoltrar offerta per survir in aperitiv mintgamai suenter las radunonzas communalas. Thomas Gautschi dall'ustria Trutg, Vella, ei s'annunziaus sco sulet ed ha surpriu il survetsch naven dil mars 2016.

Plan da basa entuorn il Péz Mundaun

Las vischnauncas da Ilanz/Glion e Sursaisa Mundaun han iniziou l'idea da schar sclarir cun in plan da master davart il futur turistic dil territori entuorn il Mundaun. Part dil project da studia fan era las Pendicularas Sursaisa Mundaun. La finamira dil plan da master eis ei da formar la stad ed igl unviern a moda attractiva ord optica dil hosp e da risguardar ils interess dils possessurs da habitaziuns secundaras sco era da sviluppar ensemen cun las pendicularas la strategia a liunga vesta e da sclarir nua ch'ils potenzials dalla regiun schein. Plinavon duei vegnir sclariu co las pendicularas duein seposiziunar ils proxims diesch onns e sch'ei drova a liunga vesta in engaschament finanziel dil maun public.

La suprastonza communal ha decidiu che la vischnaunca Lumnezia duei medemamein separticipar alla studia per elavurar in plan da basa entuorn il Péz Mundaun.

Mulin Morissen

La societad anonima per il project Mulin Morissen ei fundada e las offertas per realisar il project ein avon maun. Cunquei sa vegnir dau glisch verda per entscheiver cun las lavurs.

Renunzia al dretg da recumpra dalla parcella nr. 3512 Sut Dieschmas a Morissen

Ils proprietaris dalla parcella nr. 3512 desistan sin il project per baghegiar in hotel a Sut Dieschmas, Morissen. La vischnaunca Lumnezia havess giu il dretg da recumpra dalla parcella, sa ord motivs finansials denton buca responsar quei. Perquei ha la suprastonza communal decidiu da renunziar al dretg da recumpra dalla parcella.

Renunzia alla cumpra dalla casa dils artavels Giachen Cabalzar-Derungs a Cumbel

La cuminonza d'artavels Giachen Cabalzar-Derungs haveva fatg amogna da vender alla vischnaunca Lumnezia la parcella nr. 2146 cun la casa nr. 4-33 a Cumbel. La vischnaunca ha examinau la fatschenta cugl intent da spazzar la casa per aschia anflar ina sliigiaziun per la fermada da posta en quei liug. Tenor pareri dalla Tgira da monuments dil cantun Grischun ei la casa da gronda impurtonza pil maletg dil vitg e la finamira duei esser da mantener ella. La casa ei cuntenida ella gliesta d'inventari dil Grischun, il maletg dil vitg ei registraus egl inventari federal dils insediaments svizzers da proteger ISOS cun impurtonza regiunala. Perquei ha la suprastonza communal decidiu da desister sin la cumpra.

Indrez fotovoltaic sil tetg dalla serenera Turatscha a Degen

La Scuola aulta da Turitg per scienziadas applicadas (ZHAW) vegn a realisar in indrez fotovoltaic sil tetg dalla serenera Turatscha a Degen cugl intent da perscrutaziun per promover il svilup sin quei sector e sco exempel per ulteriurs implonts. La vischnaunca Lumnezia metta a disposiziun il tetg digl object dalla serenera Turatscha per realisar il project e sa far diever d'in prezzi reduciu pil basegns d'energia dalla serenera. Ils cuosts da planisaziun, construcziun, menaschi e manteniment digl object surpren la ZHAW.

Vendita da terren a Camuns

Sin damonda da Franziska Arpagaus-Solèr ha la suprastanza communal decidu da vender all'interessenta la surfatscha da 135 m² terren dalla parcella nr. 711 Zeznas a Camuns.

Concessiun d'in dretg da baghegiar a cunfin a Lumbrein

Sin damonda da Patric Capaul, Lumbrein, ha la suprastanza communal decidu da conceder in dretg da baghegiar a cunfin respectivamein da baghegiar sur il cunfin en favur dalla parcella nr. 5370 e per grevezia dalla parcella nr. 5369 dalla vischnaunca Lumnezia.

Schenghetg parcella nr. 2194 a Cumbel

Bruno Stöckli da Elsau Schottikon, schenghegia alla vischnaunca Lumnezia sia parcella nr. 2194 a Cumbel. Quella parcella sesanfla ella zona d'agricultura, ha ina surfatscha da 1'781 m² e cunfinescha cun la parcella nr. 2316 dalla vischnaunca Lumnezia.

Avertura dil quartier Lorta a Surcasti

La suprastanza communal ha lantschau l'avertura dil quartier Lorta a Surcasti cun surdar d'elavurar il project da baghegiar la Via Survitg sin parcella nr. 1077 sco era las lingias per il provediment d'aua e per la dismessa dallas auas piarsas. Cunquei vegn possibilitau da baghegiar ina casa sin parcella nr. 1075.

Sustegn finanziel per instituziuns

La suprastanza communal ha dau suatientscha allas suandontas damondas per contribuziuns finanzialas:

- Ediziun nova dil Cudisch Surselva – nosa patria
- Project da giubileum Chor d'affons Surselva
- Project da giubileum District da cant Surselva
- Fundaziun Grischuna per la fotografia
- Fundaziun da cultura Lumnezia per l'exposiziun passadis – über alle Berge
- Bike Marathon Lumnezia

Uffeci forestal Lumnezia

Novitads digl uffeci forestal Lumnezia e la repartiziun dallas incumbensas sco era autras informaziuns ein d'anflar sut [www.lumnezia.ch/Informaziuns/Uffeci forestal Lumnezia](http://www.lumnezia.ch/Informaziuns/Uffeci%20forestal%20Lumnezia).